

大阿彌陀佛經序

頁三

大藏經中有十餘經言阿彌陀佛濟度衆生其間四經本爲一種譯者不同故有四名一名無量清淨平等覺經乃後漢月支三藏支婁迦讖譯二曰無量壽經乃曹魏康僧鎰譯三曰阿彌陀過度人道經乃吳月支支謙譯四曰無量壽莊嚴經乃本朝西天三藏法賢譯其大略雖同然其中甚有互若互不觀省者又其文或失於太繁而使人厭觀或失於太嚴而喪其本真或其文適中而其意則失之由是釋迦文佛所以說經阿彌陀佛所以度人之旨素而無序鬱而不章予深惜之故熟讀而精考叙爲一經蓋欲復其本也其校正之法若言一事在此本爲安彼本爲杌隉則取其安者或此本爲要彼本爲泛濫則取其要者或此本爲近彼本爲迂則取其近者或彼本有之而此本闕則取其所有或彼本彰明而此本隱晦則取其明者大槩乃取其所優去其所劣又有其文碎雜而失統錯亂而不倫者則用其意以脩其辭刪其重以暢

其義其或可疑者則闕焉而不敢取若此之類皆欲訂正聖言發明本旨使不惑於四種之異而知其指歸也又各從其事類析爲五十六分欲觀者易見而喜於讀誦庶幾流傳之廣而一切衆生皆受濟度也予每校正必禱於觀音菩薩求冥助以開悟識性使無舛誤始末三年而後畢既畢乃拜而自喜目之曰大阿彌陀經蓋佛與舍利弗說者亦阿彌陀經彼則其文少故此言大以別之然佛說經非若吾聖人所說也吾聖人所說或深其文而叢其意使人索之而愈見其多或簡其文而晦其意使人思而後得佛則不然必欲詳陳曲布使人人可曉雖至愚下者亦知其意焉然而有辭直而意愈深者經所謂須信佛語深是也切不可以輕其辭而忽其意紹興壬午秋國學進士龍舒王日休謹序

誦淨口業真言  
唵修利修利摩訶修利修利娑婆訶  
次誦五淨真言  
唵尾鼠提娑婆訶  
淨身器神呪

唵林殿都戍陀那耶娑婆訶  
次向西頂禮祝云

弟子昧謹爲盡虛空界一切衆生故依盡虛空界一切諸佛一切正法一切聖僧西方極樂世界阿彌陀佛觀世音菩薩大勢至菩薩一切菩薩聲聞諸上善人昧今爲盡虛空界一切衆生持誦大阿彌陀經及讚佛懺罪迴向發願願如此等衆生各各自誦經讚佛懺罪迴向發願願盡拔濟生於極樂世界乃念大慈菩薩讚佛懺罪迴向發願偈云

十方三世佛 阿彌陀第一 九品度衆生  
威德無窮極 我今大皈依 懺悔三業罪  
凡有諸善福 至心用迴向 願同念佛人  
盡生極樂國 見佛了生死 如佛度一切  
如爲薦亡或懷灾或保安則隨意祝願不須

如前祈禱亦須誦真言先啟依三寶及西方四聖然後祝願若為自身往生則宜一一如前其功德甚大矣

佛說大阿彌陀經卷上

法會大眾分第一

如是我聞一時佛在王舍國靈鷲山中與大弟子衆千二百五十人俱一切大聖神通已達其名曰尊者了本際尊者正願尊者正語尊者大號尊者仁賢尊者離垢尊者名聞尊者善實尊者具足尊者阿難若此皆上首者又大乘衆菩薩普賢菩薩妙德菩薩慈氏菩薩等此賢劫中一切菩薩又賢護等十六正士善思議菩薩信慧菩薩空無菩薩神通華菩薩皆尊普賢大士之德具諸菩薩無量行願安住一切功德之法如是等菩薩大士一時來會

阿難發問分第二

爾時世尊容色光麗異於他日尊者阿難即

從座起偏袒右肩長跪合掌而白佛言今日世尊諸根悅豫姿色清淨光顯巍巍如鏡明瑩暢徹表裏自我侍佛以來未嘗獲覩威容有如今日豈非念過去諸佛或現在未來諸佛故致然耶佛言善哉阿難有諸天教汝來問汝自問耶阿難言我自以所見而發此問佛言汝所問者勝於供養一天下聲聞緣覺及布施諸天人民下至蝸飛蠕動之類雖至累劫尚百千萬億倍不可以及所以者何蓋諸天帝王人民下至蝸飛蠕動之類皆因汝所問而得度脫之道阿難如世間有優曇鉢華雖有其實不見其華有佛出世華然後有佛難值遇亦如此華今我出世汝善知吾意特為發問誠不妄侍佛矣汝當諦聽吾為汝說對言誠欲聞之

五十三佛分第三

佛言前已過去劫大衆多不可計無邊幅不可議爾時有佛出世名定光如來教化度脫無量衆生皆令得道乃取滅度次有佛名光遠次有佛名月光次有佛名栴檀香次有佛

名善山王次有佛名須彌天冠次有佛名須彌等曜次有佛名月色次有佛名正念次有佛名離垢次有佛名無著次有佛名龍天次有佛名夜光次有佛名安明頂次有佛名不動地次有佛名瑠璃妙花次有佛名瑠璃金色次有佛名金藏次有佛名炎光次有佛名炎根次有佛名地種次有佛名月像次有佛名日音次有佛名解脫華次有佛名莊嚴光明次有佛名海覺神通次有佛名水光次有佛名大香次有佛名離塵垢次有佛名捨獸意次有佛名寶炎次有佛名妙頂次有佛名勇力次有佛名功德持慧次有佛名蔽日月光次有佛名日月瑠璃光次有佛名無上瑠璃光次有佛名最上首次有佛名菩提華次有佛名月明次有佛名日光次有佛名華色王次有佛名水月光次有佛名除癩冥次有佛名度蓋行次有佛名淨信次有佛名善宿次有佛名威神次有佛名法慧次有佛名驚音次有佛名師子音次有佛名龍音次有佛名處世如此諸佛皆已過去

法藏本因分第四

佛言次有佛名世自在王如來應供等正覺  
 明行足善逝世間解無上士調御丈夫天人  
 師佛世尊十號具足在世教化四十二劫爾  
 時有大國王聞佛說法喜悅開悟即弃王位  
 往作沙門號法藏比丘高才智慧勇猛無能  
 及者詣彼佛所稽首禮足右繞三匝長跪合  
 掌以偈讚佛  
 如來妙色相 世間無等倫 遠勝日摩尼  
 火月清淨水 威神無有極 名聲震十方  
 皆由三昧力 精進成智慧 持覺若溟海  
 深廣無涯底 無明與貪恚 冰釋已無餘  
 從是超世間 歎仰不能已 端如好樹華  
 莫不愛樂者 處處人民見 一切皆歡喜  
 布施及淨戒 忍辱并精進 禪定大智慧  
 吾誓得此事 一切諸恐懼 普為獲大安  
 過度諸生死 無不解脫者 我至作佛時  
 種種如法王 假使恒沙數 諸佛悉供養  
 不如求正覺 堅勇必成就 能使無量刹  
 光明普照耀 濟度越恒沙 威德誰可量

我刹及莊嚴 華好獨超卓 九欲求生者  
 清淨安以樂 度脫永無窮 幸佛作明證  
 發願既如是 力行無懈怠 雖居苦毒中  
 忍之終不悔  
 大願問佛分第五

佛言爾時法藏比丘說此偈已復白世自在  
 王佛言世尊我發無上菩提之心願作佛時  
 於十方無央數佛中為最智慧勇猛頂中先  
 明照耀十方無有窮極所居刹土自然七寶  
 極明麗溫柔我化度名號皆聞於十方無央  
 數世界莫有不聞知者諸無央數諸天人民  
 以至蚰飛螻動之類來生我刹者悉皆菩薩  
 聲聞其數不可窮盡比諸佛世界悉皆勝之  
 如是者寧可得否時世自在王佛知其智識  
 高明心願廣大即為說言譬如大海一人斗  
 量歷劫不止尚可見底況人至心求道精進  
 不止何求不得何願不遂時法藏比丘聞佛  
 所說則大歡喜佛乃選擇二千一百萬佛刹  
 中諸天人民之善惡國土之麤妙隨其心願  
 悉令顯現法藏即一其心遂得天眼莫不徹

見

四十八願分第六

佛言爾時法藏比丘乃往一靜處其心寂然  
 俱無所著默坐思惟攝取彼佛刹清淨之行  
 如彼修持復詣佛所而白佛言世尊我已攝  
 取二千一百萬佛刹所以莊嚴國土清淨之  
 行願有數陳惟佛聽察彼佛告言善哉汝可  
 具說諸菩薩眾聞汝志願因以警策亦能於  
 諸佛刹修習莊嚴法藏白言第一願我作佛  
 時我刹中無地獄餓鬼禽畜以至蚰飛螻動  
 之類不得是願終不作佛第二願我作佛時  
 我刹中無婦女無央數世界諸天人民以至  
 蚰飛螻動之類來生我刹者皆於七寶水池  
 蓮華中化生不得是願終不作佛第三願我  
 作佛時我刹中人欲食時七寶鉢中百味飲  
 食化現在前食已器用自然化去不得是願  
 終不作佛第四願我作佛時我刹中人所欲  
 衣服隨念即至不假裁縫搗染浣濯不得是  
 願終不作佛第五願我作佛時我刹中自地  
 以上至於虛空皆有宅宇宮殿樓閣池流花

樹悉以無量雜寶百千種香而共合成嚴飾  
奇妙殊勝超絕其香普熏十方世界衆生聞  
是香者皆修佛行不得是願終不作佛第六  
願我作佛時我刹中人皆心相愛敬無相憎  
嫉不得是願終不作佛第七願我作佛時我  
刹中人盡無淫<sup>八</sup>泆<sup>九</sup>嗔怒愚癡之心不得是願  
終不作佛第八願我作佛時我刹中人皆同  
一善心無惑他念其所欲言皆豫相知意不  
得是願終不作佛第九願我作佛時我刹中  
人皆不聞不善之名況有其實不得是願終  
不作佛第十願我作佛時我刹中人知身如  
幻無貪著心不得是願終不作佛第十一願  
我作佛時我刹中雖有諸天與世人之異而  
其形容皆一類金色面目端正淨好無復醜  
異不得是願終不作佛第十二願我作佛時  
假令十方無央數世界諸天人民以至蚘飛  
螻動之類皆得爲人皆作緣覺聲聞皆坐禪  
一心共欲計數我年壽幾千億萬劫無有能  
知者不得是願終不作佛第十三願我作佛  
時假令十方各千億世界有諸天人民以至

蚘飛螻動之類皆得爲人皆作緣覺聲聞皆  
坐禪一心共欲計數我刹中人數有幾千億  
萬無有能知者不得是願終不作佛第十四  
願我作佛時我刹中人壽命皆無央數劫無  
有能計知其數者不得是願終不作佛第十  
五願我作佛時我刹中人所受快樂一如漏  
盡比丘不得是願終不作佛第十六願我作  
佛時我刹中人住正信位離顛倒想遠離分  
別諸根寂靜所止盡般泥洹不得是願終不  
作佛第十七願我作佛時說經行道十倍於  
諸佛不得是願終不作佛第十八願我作佛  
時我刹中人盡通宿命知百千億那由他劫  
事不得是願終不作佛第十九願我作佛時  
我刹中人盡得天眼見百千億那由他世界  
不得是願終不作佛第二十願我作佛時我  
刹中人盡得天耳聞百千億那由他諸佛說  
法悉能受持不得是願終不作佛第二十一  
願我作佛時我刹中人得他心智知百千億  
那由他世界衆生心念不得是願終不作佛  
第二十二願我作佛時我刹中人盡得神足

於一念頃能超過百千億那由他世界不得  
是願終不作佛第二十三願我作佛時我名  
號聞於十方無央數世界諸佛各於大衆稱  
我功德及國土之勝諸天人民以至蚘飛螻  
動之類聞我名號乃慈心喜悅者皆令來生  
我刹不得是願終不作佛第二十四願我作  
佛時我頂中光明絕妙勝如日月之明百千  
億萬倍不得是願終不作佛第二十五願我  
作佛時光明照諸無央數天下幽冥之處皆  
當大明諸天人民以至蚘飛螻動之類見我  
光明莫不慈心作善皆令來生我國不得是  
願終不作佛第二十六願我作佛時十方無  
央數世界諸天人民以至蚘飛螻動之類蒙  
我光明觸其身者身心慈和過諸天人不得  
是願終不作佛第二十七願我作佛時十方  
無央數世界諸天人民有發菩提心奉持齋  
戒行六波羅蜜修諸功德至心發願欲生我  
刹臨壽終時我與大衆現其人前引至來生  
作不退轉地菩薩不得是願終不作佛第二  
十八願我作佛時十方無央數世界諸天人

民間我名號燒香散花然燈懸繒飯食沙門  
起立塔寺齋戒清淨益作諸善一心繫念於  
我雖止於一晝夜不絕亦必生我刹不得是  
願終不作佛第二十九願我作佛時十方無  
央數世界諸天人人民至心信樂欲生我刹十  
聲念我名號必遂來生惟除五逆誹謗正法  
不得是願終不作佛第三十願我作佛時十  
方無央數世界諸天人人民以至蚘飛蠕動之  
類前世作惡聞我名號即懺悔為善奉持經  
戒願生我刹壽終皆不經三惡道徑遂來生  
一切所欲無不如意不得是願終不作佛第  
三十一願我作佛時十方無央數世界諸天  
人民聞我名號五體投地稽首作禮喜悅信  
樂修菩薩行諸天人莫不致敬不得是願  
終不作佛第三十二願我作佛時十方無央  
數世界有女人聞我名號喜悅信樂發善提  
心厭惡女身壽終之後其身不復為女不得  
是願終不作佛第三十三願我作佛時凡生  
我刹者一生遂補佛處惟除本願欲往他方  
設化衆生修菩薩行供養諸佛即自在往生

我以威神之力令彼教化一切衆生皆發信  
心修善提行普賢行寂滅行淨梵行最勝行  
及一切善行不得是願終不作佛第三十四  
願我作佛時我刹中人欲生他方者如其所  
願不復墜於三惡道不得是願終不作佛第  
三十五願我作佛時刹中菩薩以香華幡蓋  
真珠瓔珞種種供具欲往無量世界供養諸  
佛一食之頃即可遍至不得是願終不作佛  
第三十六願我作佛時刹中菩薩欲萬種之  
物供養十方無央數佛即自在前供養既遍  
是日未午即還我刹不得是願終不作佛第  
三十七願我作佛時刹中菩薩受持經法諷  
誦宣說必得辯才智慧不得是願終不作佛  
第三十八願我作佛時刹中菩薩能演說一  
切法其智慧辯才不可限量不得是願終不  
作佛第三十九願我作佛時刹中菩薩得金  
剛那羅延力其身皆紫磨金色具三十二相  
八十種好說經行道無異於諸佛不得是願  
終不作佛第四十願我作佛時刹中清淨照  
見十方無量世界菩薩欲於寶樹中見十方

一切嚴淨佛刹即時應現猶如明鏡覩其面  
相不得是願終不作佛第四十一願我作佛  
時刹中菩薩雖少功德者亦能知見我道場  
樹高四千由旬不得是願終不作佛第四十  
二願我作佛時刹中諸天人及一切萬物  
皆嚴淨光麗形色殊特窮微極妙無能稱量  
者衆生雖得天眼不能辯其名數不得是願  
終不作佛第四十三願我作佛時我刹中人  
隨其志願所欲聞法皆自然得聞不得是願  
終不作佛第四十四願我作佛時刹中菩薩  
聲聞皆智慧成神頂中皆有光明語音鴻暢  
說經行道無異於諸佛不得是願終不作佛  
第四十五願我作佛時他方世界諸菩薩聞  
我名號皈依精進皆速得清淨解脫三昧住  
是三昧一發意須供養不可思議諸佛而不  
失定意不得是願終不作佛第四十六願我  
作佛時他方世界諸菩薩聞我名號皈依精  
進皆速得普等三昧至于成佛常見無量不  
可思議一切諸佛不得是願終不作佛第四  
十七願我作佛時他方世界諸菩薩聞我名

號皈依精進即得至不退轉地不得是願終  
不作佛第四十八願我作佛時他方世界諸  
菩薩聞我名號皈依精進即得至第一忍第  
二忍第三法忍於諸佛法永不退轉不得是  
願終不作佛

願後說偈分第七

十三

佛言爾時法藏比丘發此願已復說偈言  
我今對佛前 特發誠實願 如獲十力身  
威德無能勝 復為大國王 富豪而自在  
常施諸財寶 利樂於貧苦 盡令諸眾生  
長夜無憂惱 發生眾善根 長養菩提果  
我至成佛時 名聲超十方 人天欣得聞  
俱來生我刹 我以智慧光 廣照無央界  
除滅諸有情 貪嗔煩惱暗 地獄鬼畜生  
亦生我刹中 一切來生者 修習清淨行  
如佛金色身 妙相悉圓滿 還以大慈心  
普濟諸沉溺 我於未來世 當作天人師  
百億世界中 說法師子吼 一切聞音者  
解悟復圓明 又如過去佛 所生慈愍行  
度脫諸有情 已無量無邊 我行亦如斯

咸使登覺岸 此願若剋果 大千應震動  
虛空諸天神 必雨珍妙華  
初修善行分第八

佛言爾時法藏比丘於彼佛所諸天魔梵龍  
神八部大眾之中發斯弘誓應時大地震動

天雨妙華以散其上空中讚言決定成佛於  
是法藏住真實慧勇猛精進修習無量功德  
以莊嚴其國是故入三摩地歷大阿僧祇劫  
修菩薩行不生慾想嗔想癡想不生慾覺嗔  
覺癡覺不著色聲香味諸法忍力成就不計  
眾苦但樂憶念過去諸佛所修善根行寂靜  
行遠離虛妄堅守誠正常以和顏愛語饒益  
眾生於佛法僧信重恭敬依真諦門植眾德  
本善護口業不譏他過善護身業不失律儀  
善護意業清淨無染恒以布施持戒忍辱精  
進禪定智慧利樂眾生令諸眾生功德成就  
速離麤言免自害害彼免彼此俱害修習善  
語自利利人致人我兼利復教化眾生修行  
六度於一切法而得自在了空無相無願無  
為無生無滅軌範具足善根圓滿隨其生處

在意所欲有無量寶藏自然發現以此施惠  
眾生今生歡喜以行教化致無量無數眾生  
發無上菩提之心如是善行無量無邊說不  
能盡

親近諸佛分第九

佛言法藏比丘行菩薩行時於諸佛所尊重  
恭敬承事供養未嘗間斷為四大大王詣佛  
所恭敬禮拜承事供養為忉利天王詣佛所  
恭敬禮拜承事供養為夜摩天王兜率天王  
化樂天王他化自在天王乃至大梵天王等  
詣佛所恭敬禮拜承事供養其次處閻浮提  
為轉輪王受灌頂位及大臣官族等詣佛所  
恭敬禮拜承事供養為刹帝利婆羅門等詣  
佛所恭敬禮拜承事供養如是無量無數百  
千萬億劫親近諸佛植眾德本以成就所願  
願成作佛分第十

佛言法藏比丘行菩薩行時容體端嚴三十  
二相八十種好悉皆具足口中常出栴檀之  
香身諸毛孔出優鉢羅華香其香普熏無量  
無邊不可思議那由他由旬眾生聞此香者

皆發無上菩提之心又手中恒出一切衣服一切飲食一切幢幡寶蓋一切音樂及一切最上所須之物利樂一切眾生令歸佛道如是積功累德無量無數百千萬億劫功德圓滿威神熾盛方得成就所願而入佛位

### 蛭蟻亦度分第十一

阿難白言法藏比丘為已成佛而取滅度為未成佛為今現在佛言彼佛如來來無所來去無所去無生無滅非過去現在未來但以酬其志願度一切眾生現在西方去此百萬世界其世界名曰極樂其佛號阿彌陀成佛以來于今十劫又在十方世界教化無央數諸天人民以至蛭蟻動之類莫不得過度解脫者

### 光明獨勝分第十二

佛言阿彌陀佛光明最為遠著諸佛光明皆所不及十方無央數佛其頂中光明有照一里者有照二里者有照三里者如是展轉漸遠有至於照千二百萬里復有佛頂中光明照一世界者有照二世界者有照三世界者

如是展轉漸遠有至於照二百萬世界者惟阿彌陀佛頂中光明照千萬世界無有窮極諸佛光明所以有遠近者何以故初為菩薩時願力功德各有大小至期作佛皆隨所得是故光明亦從而異若威神自在隨意所作不必豫計則無不同阿彌陀佛願力無邊功德超絕故比諸佛光明特為殊勝

### 十三佛號分第十三

佛言阿彌陀佛光明明麗快甚絕殊無極勝於日月之明千萬億倍而為諸佛光明之王故號無量壽佛亦號無量光佛無邊光佛無礙光佛無對光佛炎王光佛清淨光佛歡喜光佛智慧光佛不斷光佛難思光佛難稱光佛超日月光佛其光明所照無央數天下幽冥之處皆常大明諸天人民禽獸蛭蟻動之類見此光明莫不喜悅而生慈心其淫泆嗔怒愚癡者見此光明莫不遷善地獄餓鬼畜生考掠痛苦之處見此光明無復苦惱命終之後皆得解脫不獨我今稱讚阿彌陀佛光明十方無央數佛菩薩緣覺聲聞之來悉

皆稱讚亦復如是若有眾生聞此光明威神功德日夜歸命稱讚不已隨其志願必生其刹復為諸菩薩聲聞所共稱讚當亦如是我說阿彌陀佛光明威神巍巍殊妙晝夜一劫尚未能盡今為汝等略言之耳

### 阿闍世王分第十四

爾時阿闍世王太子與五百長者子各持一金華蓋前以獻佛却坐一面聞說阿彌陀佛功德光明皆大歡喜其心願言我等後作佛時皆如阿彌陀佛佛即知之告諸比丘言阿闍世王太子與五百長者子後無央數劫皆當作佛如阿彌陀佛此等行菩薩道已無央數劫皆各供養四百億佛今復供養於我往昔迦葉佛時皆常為我弟子今又至此是復會遇也時諸比丘聞是語已莫不喜悅恭敬讚歎

### 地平氣和分第十五

佛言阿彌陀佛刹中皆自然七寶所謂黃金白銀水晶瑠璃珊瑚琥珀磔磔其體性溫柔以是七寶相間為地或純以一寶為地光色

照耀奇妙清淨超越十方一切世界其國恢廓曠蕩不可窮盡地皆平正無須彌山及金剛圓一切諸山亦無大海小海及坑坎井谷亦無幽暗之所無地獄餓鬼畜生禽虫以至蝸飛蠕動之類無阿須倫及諸龍鬼神亦無雨露惟有自然流泉亦無寒暑氣象常春清快明麗不可具言有萬種自然之物如百味飲食意有所欲悉現在前意若不用自然化去隨其所念無不得之此娑婆世界有他化自在天其中天人一切所須自然化現以比於此佛刹中自然之物猶萬億倍不可以及講堂宅宇分第十六

佛言阿彌陀佛講堂精舍皆自然七寶相間而成復有七寶以為樓觀欄楯復以七寶為之瓔珞懸飾其側復以白珠明月珠摩尼珠為之交絡遍覆其上殊特妙好清淨光輝不可勝言其餘菩薩聲聞所居宮宇亦復如是彼諸天及世人衣服飲食華香瓔珞金蓋幢幡微妙音樂隨意而現所居宮宇樓閣稱其形色高下大小或以一寶二寶乃至無量眾寶悉化現而成然宮宇有隨意高大浮於空中若雲氣者有不能隨意高大止在地上如世間者其故非他能隨意者乃前世求道時慈心精進益作諸善德厚所致不能隨意者乃前世求道時不慈心精進作善微善德薄所致若衣服飲食則皆平等惟宮宇不同所以別進有勤墮德有大小示眾見之此講堂宮宇初無作者亦無所從來以此佛願大德重自然化生

寶池大小分第十七

佛言阿彌陀佛刹中講堂宮宇勝於此世界中第六天上天帝所居百千萬倍終不可及其內外復有自然流泉及諸池沼與自然七寶俱生有純一寶池者其底沙亦以一寶若黃金池者底白銀沙水晶池者底瑠璃沙珊瑚池者底琥珀沙有二寶為一池者其底沙亦以二寶若黃金白銀池者底沙則以水晶瑠璃若水晶瑠璃池者底沙則以珊瑚琥珀若珊瑚琥珀池者底沙則以磤磤瑪瑙若三寶四寶以至七寶共為一池則底沙亦如是

此諸寶池有方四十里者有方五十里者有方六十里者如是展轉漸大以至於方二萬四百八十里若大海然是諸池者皆菩薩聲聞諸上善人生長之所有時浴於其間若彼佛池其方倍此皆七寶相間而成白珠明月珠摩尼珠為之底沙是諸池者皆八功德水湛然盈滿清淨香潔味甘露其間復有百種異華枝皆千葉光色既異香氣亦異芬芳馥郁不可勝言

蓮花化生分第十八

佛言十方無央數世界諸天人民以至蝸飛蠕動之類往生阿彌陀佛刹者皆於七寶池蓮華中化生自然長大亦無乳養之者皆食自然之食其容貌形色端正淨好固非世人可比亦非天人可比皆受自然清虛之身無極之壽

佛說大阿彌陀經卷上



佛說大阿彌陀經卷下

貞四

句者比類分第十九

佛言譬如句者在帝王之側形容儀寧可類否阿難答言句者在帝王之側羸陋醜惡無以為喻百千萬倍不可以及所以然者皆坐前世不植德本積財不施富有益慳但欲唐得貪求無厭不信修善得福益作諸惡如是壽終墮於惡趣受諸長苦得出為人下賤醜弊示衆見之所以帝王人中尊貴皆由宿世積德所致慈惠溫良博施兼濟損己利物無所違爭是以壽終應生天上享其福樂餘慶猶存遂生王家自然尊貴儀容端正衆所敬事美衣珍饈隨心服御自非宿福何以能然佛言汝言是矣若言形相威光帝王雖人中尊貴比轉輪聖王猶如鄙陋若彼句者在帝王之側轉輪聖王天下第一比忉利天王又百千萬倍不可以及忉利天王比第六天王又百千萬倍不可以及第六天王比阿彌陀佛刹中諸菩薩聲聞諸上善人又百千萬倍不可以及

澡雪形體分第二十

佛言阿彌陀佛刹中諸菩薩聲聞諸上善人若人七寶池中澡雪形體意欲令水沒足水即沒足欲令至膝水即至膝欲令至腰至腋以至于頸水亦如是欲淋灌其身悉如其意欲令其水如初即如初調和冷暖無不順適開神悅體滌蕩情慮清明澄潔瑩若無形既出浴已各坐於一蓮華之上自然微風徐動吹諸寶樹或作音樂或作法音吹諸寶花皆成異香散諸菩薩聲聞大衆之上華墮地者積厚四寸極目明麗芳香無比及至小姜自然亂風吹去諸菩薩聲聞大衆有欲聞法音者有欲聞音樂者有欲聞華香者有皆不欲聞者其欲聞者輒獨聞之不欲聞者寂無所聞各適其意無所違忤其為快樂常得自然

澡畢進業分第二十一

佛言饒皆浴已各往修進有在地講經者有在地誦經者有在地自說經者有在地口授經者有在地聽經者有在地念經者有在地

思道者有在地坐禪一心者有在地經行者仍有在虛空中講經者在虛空中誦經者在虛空中自說經者在虛空中口授經者在虛空中聽經者在虛空中念經者在虛空中思道者在虛空中坐禪一心者在虛空中經行者其間有未得須陀洹者因是得須陀洹未得斯陀含者因是得斯陀含未得阿那含者得阿那含未得阿羅漢者得阿羅漢有未得不退轉地菩薩者乃得不退轉地菩薩各隨其質而有所得莫不欣然適意而悅

池流法音分第二十二

佛言諸寶池中其水轉相灌注不遲不疾波揚無量自然妙聲或作說佛聲或作說法聲或作說僧聲或說寂靜聲說空無我聲說大慈悲聲說波羅蜜聲說十力無畏不共法聲說諸通慧聲說無所作聲說不起滅聲說無生忍聲乃至說甘露灌頂一切妙法如是等聲稱其所欲莫不聞者喜悅無量發清淨心無諸分別正直平等成熟善根永不退於無上菩提於彼世界不復聞於地獄餓鬼畜生

夜叉殺生偷盜聞諍惡口兩舌如是等一切惡聲聞且絕無況有其實但有自然清淨之音自然快樂之事是故其刹名曰極樂

### 池岸花樹分第二十三

佛言諸寶池岸上有無數栴檀香樹吉祥果樹花果恒芳香氣流布又有天優鉢羅華鉢曇摩華拘牟頭華分陀利華雜色光茂彌覆水上復有七種寶樹其純一寶樹者根莖枝葉花果皆以一寶二寶為一樹者根莖枝葉花果間以二寶三寶為一樹者根莖枝葉花果間以三寶四寶為一樹者根莖枝葉各以一寶其花與果同於根莖五寶為一樹者根莖枝葉各以一寶果則同於其根六寶為一樹者根莖枝葉花果各以一寶七寶為一樹者亦復如是惟加其節益用一寶如是諸樹種種各自異行行相植莖莖相望枝枝相准葉葉相向花花相順果果相當如是行列數百千里間以寶池又復如是乃至周遍世界榮色光耀不可勝視清風時發自成微妙音聲無可比者

### 樹音妙樂分第二十四

佛言如世間帝王有萬種音樂不如轉輪聖王諸音樂中一音之美百千萬倍如轉輪聖王萬種音樂不如忉利天王諸音樂中一音之美百千萬倍如忉利天王萬種音樂不如第六天王諸音樂中一音之美百千萬倍如第六天王萬種音樂不如阿彌陀佛刹中諸七寶樹一音之美百千萬倍復有自然種種妙樂而其音聲無非妙法清暢嘹亮微妙和雅十方世界音聲之中最為第一

### 自然飲食分第二十五

佛言阿彌陀佛刹中諸往生者其飲食時有欲銀鉢者有欲金鉢者有欲水晶瑠璃鉢者有欲珊瑚琥珀磗碼碼鉢者或欲明月珠摩尼珠白玉紫金等鉢皆隨其意化現在前百味飲食充滿其中酸鹹辛淡各如所欲多亦不餘少亦不缺亦不以美故過量而食惟以資益氣力食已自然消散而無遺滓或但見色聞香意以為食自然化去再欲食時復現如前極彼刹中清淨安穩微妙快樂次於

### 無為泥洹之道

### 景象殊勝分第二十六

佛言阿彌陀佛刹中皆諸菩薩聲聞諸上善人無有婦女皆壽命無央數劫皆洞視徹聽遙相瞻見遙相聞語聲皆求善道者無復異人其面目皆端正淨好無復醜陋其體性皆智慧勇健無復庸愚其所欲言皆豫相和意心所存念無非道德形於談說無非正事皆相愛敬無或憎嫉皆相順序或無差池動合禮義穆若弟兄言語誠實轉相教令欽若承受不相違戾意皆潔清無所貪染淫泆嗔怒愚癡之態盡絕無餘邪心妄念消釋無有神氣和靜體力輕清樂從經道啟迪慧性通其宿命雖歷萬劫已所從來靡不知之復知十方世界去來現在之事復知無央數天上下人民以至蚘飛蠕動之類心意所念口所欲言復知此等衆生當於何劫何歲盡度脫為人得生極樂世界或作菩薩或作聲聞皆豫知之其有神智洞達威力自在者能於掌中擎一切世界

道場寶樹分第二十七

佛言阿彌陀佛刹中其道場樹高一千六百由旬四布枝樹八百由旬根入寶地五百由旬及一切眾寶自然合成花果敷榮作無量百千殊麗之色於其樹上復以月光摩尼寶帝網摩尼寶持海輪寶如是等眾寶莊嚴周帀其間復垂愛寶瓔珞大綠寶瓔珞青真珠瓔珞如是等眾瓔珞綴飾復有真妙寶網羅覆其上成百千萬色種種異變無量光艷照耀無極或時微風徐動演出無量妙法音聲其聲流布遍諸佛刹眾生聞者得深法忍住不退轉地無其耳病以至成就無上菩提若有眾生見此樹者乃至成佛於其中間不生眼病若有眾生聞樹香者乃至成佛於其中間不生鼻病若有眾生食樹果者乃至成佛於其中間舌亦無病若有眾生樹光照者乃至成佛於其中間身亦無病若有眾生觀想樹者乃至成佛於其中間心得清涼遠離貪等煩惱之病皆得甚深法忍住不退轉地彼刹諸天人世人見此樹者得三法忍一者音

響忍二者柔順忍三者無生法忍如是樹木花果與諸眾生而作佛事皆以此佛本願力故堅固願故精進力故威神力故

寶網音香分第二十八

佛言阿彌陀佛刹中復有無量寶網彌覆其上皆以金銀真珠百千雜寶奇妙珍異莊嚴校飾周帀四面垂以寶網光色晃曜盡極嚴麗又有自然德風徐動不寒不暑溫和柔輭不遲不疾吹諸寶網及諸寶樹演發無量微妙法音流布萬種清雅德香其有聞者塵勞垢習自然不生風觸其身皆得快樂譬如比丘得滅盡定三昧或時風吹散花遍滿其刹隨色次第而不雜亂柔軟光澤馨香芬烈足履其上陷下四寸隨舉足已還復如故花用已訖自然化沒

蓮花現佛分第二十九

佛言阿彌陀佛刹中眾寶蓮花周遍世界一寶花百千萬葉其花光明無量雜色青色青光白色白光玄黃朱紫之色其光亦然燦燦爛明耀日月一一花中出三十六百千

億光一一光中出三十六百千億佛其身皆紫金色相好殊特一一諸佛又放百千光明普為十方眾生說微妙法如是諸佛各各安立無量眾生於佛正道

大會說法分第三十

佛言阿彌陀佛為諸菩薩聲聞及諸天世人廣宣大教敷演妙法之時皆以次序大會於七寶講堂佛初為諸菩薩聲聞及諸天世人說法莫不欣然悅適心得解悟各隨其資而有所得即時四方自然微風吹諸寶樹作五百音聲復吹諸寶花停結空中枝葉下向以成供養既而墜地則自然亂風吹去於是第一四天王諸天人持百千花香百千音樂自空而降以供養佛及菩薩聲聞之眾聽聞說法散諸香花奏諸音樂於是第二忉利天上至欲界諸天以至第七梵天及三十六天如是等天諸天人各持百千香華百千音樂轉相倍勝自空而降皆以前後次序更相開避供養佛及菩薩聲聞之眾聽佛說法散諸香花奏諸音樂諸天人有未得須陀洹道

者有未得斯陀含道者有未得阿那含道者  
有未得阿羅漢道者有未得不退轉地菩薩  
者聞佛說法即心開意解隨所未得而自得  
之當此之時熙然歡喜不可勝言

十方聽法分第三十一

佛言其次東方恒河沙數諸佛各遣無量無  
數菩薩及無量無數聲聞之衆持諸香華幢  
幡寶蓋種種供具前以獻佛各禮足已稱讚  
寶刹功德莊嚴聽說妙法皆大喜悅作禮而  
去其次南方世界恒河沙數諸佛各遣無量  
無數菩薩及無量無數聲聞之衆持諸香華  
幢幡寶蓋種種供具前以獻佛各禮足已稱  
讚寶刹功德莊嚴聽說妙法皆大喜悅作禮  
而去其次西方北方四隅上下亦復如是爾  
時世尊復說偈言

東方諸世界 數若恒河沙 一一世界中  
聲聞與菩薩 無量復無數 各發最勝心  
持諸妙供養 往獻阿彌陀 南西北四隅  
上下亦如是 悉皆供獻已 旋繞懷愛敬  
讚歎大福田 最上復希有 皆由宿願弘

精進無窮極 究達神通慧 遊入勝法門  
具足功德寶 妙智無等倫 慧日朗世間  
消除生死雲 莊嚴極樂刹 威神叵思議  
曠蕩已無邊 佛刹絕無比 稱讚既如是  
欽慕不能已 復以天妙花 散空成寶蓋

縱廣百由旬 色相愈新麗 假茲伸供養

自喜還自慶 願我積衆善 致我刹亦然

先了諸法性 夢幻本來空 次度諸衆生

遠大無窮極 如是寶刹者 何憂不可成

爾時佛慈悲 開導一切心 神通化大光

從佛面門出 四散數無窮 普照億佛刹

人天咸覩已 還歸佛髻中 時會諸有情

敬歎未曾有 願與沈淪者 盡證菩提道

觀音發問分第三十二

爾時佛說此偈已會中有觀自在菩薩即從

座起合掌向佛而作是言世尊以何因緣阿

彌陀佛於其面門放無量光照諸佛刹惟願

世尊方便解說令諸衆生及他方菩薩聞是

語已心生解悟於佛菩提志樂趣求永無退

轉佛言汝當諦聽吾爲汝說彼佛如來於過

去無量無邊阿僧祇劫前爲菩薩時發大誓  
言我於未來世成佛時若有十方世界無央  
數諸天人以至於蚘飛螻動之類聞我名號  
或頂禮憶念或稱讚皈依或香花供養如是  
衆生速生我刹見此光明即得解脫若諸菩

薩見此光明即得授記證不退位手持香華

及諸供具往十方無邊佛刹供養諸佛而作

佛事增益功德經須臾頃復還本刹是故光

明而入佛頂

菩薩出供分第三十三

佛言阿彌陀佛刹中諸菩薩承佛威神一食

之頃遍至十方無量世界供養諸佛隨心所

欲花香伎樂衣蓋幢幡無數供養之具自然

化現在前珍妙殊特非世所有輒以奉佛及

諸菩薩聲聞之衆或欲獻花者即於空中化

成花蓋小者周圍四十里或五十里或六十

里如是展轉漸大有至於六百萬里各隨其

小大停於空中以成圓象勢皆下向以成供

養光色照耀香氣普薰不可勝言既已用已

隨其前後以次化沒諸菩薩復於空中共奏

天樂以微妙音歌歎佛德聽受經法喜悅無量既供養已忽然輕舉還至本刹猶為未食之前

菩薩功德分第三十四

佛言阿彌陀佛刹中諸菩薩衆容貌柔和相好具足禪定智慧通達無礙神通威德無不滿足深入法門得無生忍諸菩薩道究竟明了調伏諸根身心柔軟安住寂靜盡般涅槃深入正慧無復餘習依佛所行七覺聖道修行五眼照真達俗辯才總持自在無礙善解世間無邊方便所言誠諦深入義味敷演正法廣度有情除彼一切煩惱之患等觀三界空無所有知一切法悉皆寂滅無相無為無因無果無取無捨無縛無脫去諸分別遠離顛倒堅固不動如須彌山智慧明了如日月朗廣大如海出功德寶熾盛如火燒煩惱薪忍辱如地一切平等清淨如水洗諸塵垢如虛空無邊不障一切故如蓮花出水離一切染故如雷音震響出法音故如雲覆降法雨故如風動樹長莖提芽故如牛王聲異衆

牛故如龍象威難可測故如良馬行乘無失故如師子座離怖畏故如尼拘陀樹覆蔭大衆故如優曇鉢華難值遇故如金剛杵破邪山故如梵王身生梵衆故如金翅鳥勝毒龍故如空中禽無住跡故如雪山照功德淨故如慈氏觀法界等故專樂求法心無厭足常欲廣說志無疲倦擊法鼓建法幢曜慧日除癡暗修六和敬常為師導為世燈明最勝福田拔諸欲刺以安群生功德殊勝莫不尊重恭敬供養無量諸佛常為諸佛所共讚歎究竟菩薩諸波羅蜜修空無相無願三昧及不生不滅諸三昧門遠離聲聞緣覺之地阿難彼諸菩薩成就如是無量功德我但為汝舉要言之若廣說者雖歷一劫不能窮盡

泥洹去者分第三十五

爾時座中有阿逸多菩薩即從座起合掌問佛阿彌陀佛刹中諸聲聞有般泥洹者否佛言此四天下星汝見之否答云皆已見之佛言如大目犍連飛行四天下下一夜可盡知其星數彼刹聲聞之衆尚百千億倍於四

天下星不可盡知其數其一聲聞般泥洹者猶如大海減去一滯不覺其少其般泥洹者數雖衆多猶如大海減去一溪之水亦不覺其少雖般泥洹者及無央數其現在者與新得聲聞者其數亦無量無極猶如大海減一恒河之水而不覺其少使天下諸水皆入於海亦不能覺海水增多所以者何以海為天下諸水之王容納無窮彼佛刹中亦復如是使十方無央數佛刹諸天人民以至蚰蛄蟻動之類皆往生其中亦不能覺彼刹人數增多所以者何以彼刹獨冠於十方無央數佛刹而至廣至大曠若無邊所以者何本其為菩薩時志願廣大精進不懈積德無窮故能如是

光明大小分第三十六

佛言阿彌陀佛與其刹中諸菩薩聲聞頂中光明各有大小諸聲聞頂中光明各照七丈諸菩薩頂中光明各照千億萬里有二菩薩尊為第一其一名觀世音一名大勢至常在佛側坐侍政論佛與二菩薩對談十方世界未來現在之事佛欲使二菩薩往他方佛所

神足而往駛疾如佛分身生此世界助佛揚化於彼刹中不失現在其智慧威神最為第一頂中光明各照千佛世界世間人民善男子善女人若有急難恐怖或值官事一心皈命觀世音菩薩無不得解脫者其佛頂中光明極大極明彼世界中日月星辰以佛光勝故亦無光耀皆住空中亦不運轉故無一日二日一月二月亦無歲數亦無劫數以此間計之彼佛光明後無數劫無數劫重復無數劫無數劫不可復計劫終無冥晦之時其世界無壞亦復如是

恩德無窮分第三十七

佛言阿彌陀佛於世間教化意欲度脫十方無央數佛刹中諸天人民以至蚰飛蠕動之類皆往生其刹悉令得泥洹之道其間欲作佛者即令修菩薩行以至成佛既成佛已轉相教化度脫十方無央數世界中諸天人民以至蚰飛蠕動之類往生其刹者不可勝數作菩薩以至成佛者亦不可勝數是此佛恩德及於十方世界無窮無極不可思議

佛壽人數分第三十八

佛言汝欲知阿彌陀佛壽命無極否阿逸多對言誠欲聞知佛言明聽悉十方無央數世界諸天人民以至蚰飛蠕動之類皆得為人又皆作緣覺聲聞共坐禪一心合其智慧為一智慧以計數彼佛壽命幾千億萬劫無有能知者其諸菩薩聲聞及彼刹諸天世人壽命亦復如是復令十方各千世界中諸天人民以至蚰飛蠕動之類皆得為人又皆作緣覺聲聞共坐禪一心合其智慧為一智慧以計數彼刹中諸菩薩聲聞幾千億萬人莫有能盡知者彼佛壽命浩浩渺渺無窮無極誰能信知惟佛知耳

逝次作佛分第三十九

阿逸多復白佛言阿彌陀佛功德壽命威神光明乃如是耶佛言彼佛至般泥洹時觀世音菩薩乃當作佛掌握化權教化度脫十方世界諸天人民以至蚰飛蠕動之類皆令得泥洹之道欲作佛者則至作佛既作佛已轉相教化轉相度脫如一大師阿彌陀佛無有

窮極其恩德所及一無有異復住無央數劫無央數劫不可復計劫一一皆法阿彌陀佛乃般泥洹其次大勢至菩薩作佛掌握化權教化度脫一如阿彌陀佛經歷劫數永無般泥洹時

佛智無極分第四十

阿難復從座起長跪合掌而白佛言他方世界皆有須彌山阿彌陀佛刹中獨無此山何耶佛言汝有疑於佛耶十方世界無窮無極不可思議佛智亦如是其中諸大海水欲以一人斗量而盡汝智亦如是往昔過去世億萬億劫有億萬億佛各自有名號無有同名我名號釋迦文者復經億萬億劫間有同名我名號如是積劫不已其同名我名號者乃如恒河水邊流沙一沙一佛比屬過去我盡見之今現在面南正坐見南方億萬億世界其中有佛各自有名號無有同名我名號釋迦文者又復過億萬億世界間有同名我名號如是過世界不已其有同名我名號者乃如恒河水邊流沙一沙一佛東西北方四隅上下亦復

如是此屬現在我盡見之將來億萬億劫中有億萬億佛各自有名號無有同我名號釋迦文者復經億萬億劫間有同我名號如是積劫不已其同我名號者如恒河水邊流沙一沙一佛此屬未來我盡見之是知佛之智慧能通十方世界去來現在無窮無極不可思議豈可以斗量之智而妄窺測

獨無須彌分第四十一

阿難聞佛所言則大恐怖毛髮聳然復白佛言非敢有疑於佛所以問者以他方世界四

天王天及忉利天皆依須彌山而住彼獨無此山恐佛般泥洹後有來問者無以告之故以問佛佛言他方世界第三炎摩天上至第七梵天皆何所依而住對言自然在於空中佛言彼刹中無須彌山其四天王與忉利二天亦復如是天人行業果報不可思議其諸衆生住行業之地亦不可思議況彼佛威神浩大凡有作為無施不可無須彌山無復何疑

十方稱讚分第四十二

佛告阿難東方有恒河沙世界諸佛出廣長舌相放無量光說誠實言稱讚阿彌陀佛功德不可思議南方亦有恒河沙數世界諸佛出廣長舌相放無量光說誠實言稱讚阿彌陀佛功德不可思議西方北方四隅上下亦復如是所以者何欲令諸天帝王人民盡聞阿彌陀佛名號憶念受持皈依供養求生其刹是人命終必得往生若有衆生聞其名號信心喜悅乃至一念至誠迴向願生其刹必得往生惟除五逆誹謗正法

三輩往生分第四十三

佛言十方世界諸天人民有志心欲生阿彌陀佛刹者別為三輩其上輩者捨家棄欲而作沙門心無貪慕持守經戒行六波羅蜜修菩薩業一向專念阿彌陀佛修諸功德是人則於夢中見佛及諸菩薩聲聞其命欲終時佛與聖衆悉來迎致即於七寶水池蓮華中化生為不退轉地菩薩智慧威力神通自在所居七寶宮宇在於空中去佛所為近是為上輩生者其中等者雖不能往作沙門大修

功德常信受佛語深發無上菩提之心一向專念此佛隨力修善奉持齋戒起立塔像飯食沙門懸繒然燈散花燒香以此迴向願生其刹命欲終時佛亦現其身光明相好與諸大衆在其人前即隨往生亦住不退轉地功德智慧次於上等生者其下輩生者不能作諸功德不發無上菩提之心一向專念每日十聲念佛願生其刹命欲終時亦夢見此佛遂得往生所居七寶宮宇惟在於地去佛所為遠功德智慧又次於中輩生者

必修十善分第四十四

佛言行菩薩道生阿彌陀佛刹者即得不退轉地菩薩具三十二相紫磨金色八十種好漸次以入佛位欲於何方世界作佛皆如所願若不能大精進禪定盡持經戒必修十善一不殺生二不偷盜三不邪淫四不調欺五不飲酒六不兩舌七不惡口八不妄言九不嫉妬十不貪欲不斬吝不嗔恨不邪見篤於孝順謹於誠信信受佛語深信作善得福奉持如是善法晝夜思惟阿彌陀佛及彼刹種

種功德莊嚴志心皈依頂禮供養是人命終心不顛倒即得往生聞無量無數諸佛稱讚此佛功德永不退轉無上菩提復有三等分第四十五

佛言其次齋戒清淨一心常念阿彌陀佛欲生其刹十晝夜不斷絕者命終必得往生縱不得晝夜當絕慮去憂勿與家事勿近婦人端身正心斷除愛欲齋戒清淨志心意念彼佛持誦名號欲生其刹止一晝夜不絕斷者命終亦得往生若有善男子善女人發菩提心持諸禁戒堅守不犯饒益眾生所作善緣悉以施與令得安樂當憶此佛及彼刹境界是人命絕往生即如佛色相種種莊嚴賢聖圍繞速聞無上妙法

一生補佛分第四十六

佛言諸往生者皆具足三十二相十八究竟深入妙法要義諸根明利其初鈍根者成就二忍利根者得不可計無生法忍皆當一生遂補佛處所以者何彼佛刹中皆住於正定之聚無諸邪聚及不定之聚復無三種過失一者

心無虛妄二者住不退轉三者善無唐捐所以生於彼者有進無退直至成佛惟有宿願速度眾生則以弘誓功德而自莊嚴入他方生死界中作師子吼說法度脫爾時阿彌陀佛以威神力令彼教化一切眾生皆發信心乃至成佛於其中間不受惡趣神通自在常識宿命雖生五濁惡世形跡與同其清淨快樂無異本刹

大會寶池分第四十七

佛言十方無央數世界諸天人民比丘僧比丘尼優婆塞優婆夷往生阿彌陀佛刹者群眾大會於七寶池中人人各坐一大蓮華之上自陳前世所持經戒所作善法所從來生本末其所好法及所得淺深與智慧多寡從上次下轉相言之其人若不豫作諸善不明經理於此應對自然促迫十九其心慚悔悔亦無及但慷慨發憤慕及等夷

世人極苦分第四十八

佛言世人於劇惡極苦之中勤身營務以自給濟無貴賤貧富無少長男女皆憂財物累

念積慮為心走使無時安息若有田憂田有宅憂宅有牛馬六畜奴婢衣食什物悉共憂之尊貴豪富既有斯患嬰結于心不能自適若貧窮下劣常苦困乏無田亦憂欲有其田無宅亦憂欲有其宅無牛馬六畜奴婢衣食什物無不憂之欲其皆有適有一物復缺一物適有是事復缺是事勤苦若此休息無時不達於道德迷沒於嗔怒貪恨於貨色坐斯不得道當入苦惡趣展轉其中雖數千億劫無有出期痛不可言極可哀愍今語汝等世間之事擇其善者勤而行之愛欲榮華不可常保皆當別離無可樂者乘佛在世當勤精進願生極樂世界

五道昭明分第四十九

佛言苦心與語令得解脫若不信悟無益其人大命將至悔亦何及天地之間五道昭明恢廓浩渺窈窕冥冥業報相生轉相承受美惡慘毒皆自當之孰使如是理之自然善人行善從樂入樂從明入明惡人行惡從苦入苦從暗入暗世人昧此惡道不絕故有自然

地獄餓鬼禽獸蚘飛蠕動之類展轉其中世  
世累劫無由出離是為大患痛不可言惟修  
淨土直得超去

壽數隨意分第五十

彌勒復白佛言今聞佛所說莫不喜悅諸天  
人民以至蚘飛蠕動之類皆蒙慈恩授解脫  
法佛語教誡甚善甚深佛言汝從無數劫來  
修菩薩行欲度諸天人民以至蚘飛蠕動之  
類從汝得道者無央數至得泥洹之道者亦  
無央數汝及十方世界諸天帝王人民若比  
丘僧比丘尼優婆塞優婆夷等從無數劫來  
流轉五道憂畏勤苦不可具言至于今世生  
死不絕與佛相值聽受經法又復得聞阿彌  
陀佛快哉甚善吾助汝喜汝今可厭生老病  
死痛苦惡露不淨無可樂者宜自決斷端身  
正行益作諸善修已潔體洗除心垢言行忠  
信表裏相應人能自度轉相拯濟精明求願  
積累善本雖一切勤苦亦須臾之間後生阿  
彌陀佛刹快樂無極長與道德合明永拔生  
死根本無復貪恚愚癡苦惱之患欲壽一劫

百劫千劫萬億劫無央數劫不可復計劫皆  
隨意所欲無不得之欲衣得衣欲食得食皆  
如其意次於泥洹之道汝等各宜精進無得  
狐疑無得中悔自為過咎以至生於彼刹邊  
地雖在七寶城中經五百歲受其因謫

八端檢束分第五十一

佛言汝等當自端身當自端心耳目鼻口手  
足皆當自端束檢中外無隨嗜欲益作諸善  
當布施德不犯道禁忍辱精進一心智慧  
展轉復相教化使彼為德立善慈心正意齋  
戒清淨如是一晝夜勝於阿彌陀佛刹中為  
善百歲所以者何以彼刹中無修營為物皆  
自有人悉為善無毛髮之惡於此修善十晝  
夜勝於他方佛刹為善千歲所以者何他方  
佛刹悉皆為善無造惡之所故其福德亦皆  
自然其次有世界為善者多為惡者少亦有  
自然之物不待修營若此世界中為惡極多  
為善極少不自修治物無自有或轉相欺詒  
勞心苦形如是忽務未嘗寧息吾哀世人教  
誨切至今超彼岸永脫苦趣

眾見佛相分第五十二

佛告阿難汝起整衣合掌恭敬面西為阿彌  
陀佛作禮阿難如教作禮白佛言願見阿彌  
陀佛及極樂世界與諸菩薩聲聞大眾說是  
語已阿彌陀佛即放大光明普照一切世界  
其中所有悉皆不現惟見佛光猶如劫水彌  
滿世界爾時阿難見阿彌陀佛容體巍巍如  
黃金山高出一切諸世界上相好光明無不  
照耀會中四眾悉皆覩見佛言我說阿彌陀  
佛及諸菩薩聲聞及彼刹中自然七寶及一  
切所有與此相見有無異否對言今此所見  
與佛所言一無有異爾時諸天人民以至蚘  
飛蠕動之類皆覩見阿彌陀佛光明莫不慈  
心喜悅諸地獄畜生餓鬼有拷治痛苦者即  
皆解脫諸盲者悉皆能視聾者即皆能聽瘡  
者即皆能言癩者即皆能伸跛蹇者即皆能  
趨凡病者即皆痊愈諸狂愚者即皆點慧姪  
洩者皆修梵行嗔恨者皆慈和為善有被毒  
者毒皆不行鐘鼓琴瑟笙篳樂器諸伎不鼓  
自成五音之聲婦女珠璣亦皆自然震響百

鳥畜獸皆自然歡鳴當此之時莫不喜悅咸得過度

疑城胎生分第五十三

佛告彌勒汝見彼刹有胎生否對云見胎生者所處宮殿或百由旬或五百由旬各於其中受諸快樂如忉利天人何因緣故彼刹而有胎生佛言若有衆生修諸功德願生彼刹後有悔心亦復疑惑不信有彼佛刹不信有往生者亦不信布施作善後世得福其人雖爾續有念心暫信暫不信志意猶豫無所專據臨命終時佛乃化現其身令彼目見口雖不能言其心即喜乃悔不免作諸善以悔過故其過差少亦生彼刹惟不能前至佛所方入邊地見七寶城即入其中於蓮花中生受身自然長大飲食亦皆自然其快樂如忉利天人真四惟於城中經五百歲不得見佛不聞經法不見菩薩聲聞聖衆無由供養於佛修習菩薩功德以此為苦示其小謫是故彼刹名為胎生當知生疑惑者失大利益若有衆生信受經法奉持齋戒作諸功德至心迴向命

終即於七寶池中蓮花中生跏趺而坐須臾之間身相光明智慧威神如諸菩薩安得名為胎生他方諸大菩薩發心欲見阿彌陀佛及諸菩薩聲聞恭敬供養命終徑於極樂世界七寶蓮花中化生自然即時見佛安得名為胎生

菩薩往生分第五十四

彌勒復白佛言世尊於此世界有幾何不退轉地菩薩往生阿彌陀佛刹佛言此世界有七百二十億不退轉地菩薩往生彼刹一一菩薩已曾供養無央數佛以此如彌勒者皆當作佛及諸小菩薩及修習少功德者不可勝計皆當往生不但我刹諸菩薩等往生於彼他方佛刹亦復如是其第一佛名光遠照有八十億菩薩皆當往生第二佛名寶藏有九十億菩薩皆當往生第三佛名無量音有二百二十億菩薩皆當往生第四佛名無極光明有二百五十億菩薩皆當往生第五佛名龍勝有六百億菩薩皆當往生第六佛名勇光有萬四千菩薩皆當往生第七佛名具

足交絡有十四億菩薩皆當往生第八佛名離垢光有八十億菩薩皆當往生第九佛名德首有八百一十億菩薩皆當往生第十佛名妙德山有萬億菩薩皆當往生第十一佛名慧辯有十億菩薩皆當往生第十二佛名無上華有無數不可稱計菩薩其地皆不退轉智慧勇猛已曾供養無量諸佛於七日中即能攝取百千億劫大士所修堅固之法斯等菩薩皆當往生第十三佛名樂大妙音有七百九十億大菩薩諸小菩薩及比丘等不可稱計皆當往生不持此十四刹中諸菩薩衆皆當往生十方無量佛刹中其往生者甚多無數不可復計我但說十方無央數佛名號晝夜一劫尚未能盡況其菩薩當往生者今為汝等乃略言之

聞法因緣分第五十五

佛言世間人民前世為善乃得聞阿彌陀佛名號功德若慈心喜悅志意清淨毛髮聳然淚即出者皆前世嘗行佛道或他方佛所嘗為菩薩固非凡人若不信心亦不信佛語者

乃惡道中來餘殃未盡愚癡不解未當解脫  
 多有菩薩欲聞此經而不得聞若得聞者於  
 無上道永不退轉故當信受讀誦如說修行  
 吾今為汝等說此經典令見阿彌陀佛及其  
 國土與一切所有所當為者必勉為之當來  
 之世經道滅盡我以慈悲哀愍特留此經百  
 歲衆生值遇無不得度若有衆生於此經典  
 書寫供養受持讀誦為人演說乃至晝夜思  
 惟佛刹及佛身功德臨壽終時佛與聖衆現  
 其人前經須臾間即生彼刹

正法難聞分第五十六

佛言佛世難值正法難聞如來所言必應從  
 順於此經典作大守護為諸衆生長夜利益  
 超生淨刹永離五趣爾時世尊復說偈言  
 若不往昔修福慧 於此正法不能聞  
 已曾欽奉諸如來 故有因緣聞此義  
 聞已受持及書寫 讀誦讚演并供養  
 如是一心求往生 決定徑歸極樂刹  
 上品上生復何疑 皆賴平時修積力  
 彼佛刹樂無邊際 惟佛與佛乃能知

聲聞緣覺滿世間 盡其神智莫能測  
 假使長壽諸衆生 命住無數俱胝劫  
 稱讚如來功德身 究竟淺智不能盡  
 大聖法王宣妙法 濟度一切脫沉淪  
 若有受持揚說者 真是菩提殊勝友  
 佛說是經已時彌勒菩薩長老阿難諸菩薩  
 聲聞及十方來諸大衆靡不喜悅信受奉行

佛說大阿彌陀經卷下

右龍舒居士王虛中具林校正四譯經文析  
 為五十六分無量壽尊因地果海論次煥  
 然安樂世界具景佳致皎如指掌披卷詳  
 閱端坐靜思則七寶莊嚴混成宇宙聖賢  
 海會聲教儀刑密移於此土矣大哉壽尊  
 之願力奇哉淨域之境象美哉虛中之盛  
 心也第十四分增入阿闍世王太子與五  
 百長者子一段緣起則知如來法門廣大  
 不拒來者凡具是志歸斯受之不意法藏  
 之後復見此人塵劫之外淨刹相望彼既

文夫我亦爾不應自輕而退屈後學之士  
 觀斯記剝寧無聞風而興起者乎至第三  
 十九分則現在會中二法王子曠劫精勤  
 位鄰等妙次補佛處掌握化權一曰普光  
 功德山王二曰善住功德寶王後無央劫  
 相繼出興到此則安樂舊號轉而為衆寶  
 善集莊嚴矣此則備見於他經約其依報  
 住處蓋在彼界第四兜率天宮而此書之  
 所未及言者其第三十二分二法王子於  
 彼佛土智慧威神德業輝光最為第一入  
 則坐侍正論出則揚化他方於彼刹中不  
 失現在故圓通大士元住海山瓔珞童子  
 曾紹祖位法起於此願輪與彼行海雖未  
 之逮而實有志焉方法藏菩薩之發是願  
 也先佛世尊勉而謂曰譬如大海一人斗  
 量歷劫不止尚可見底沉人志心求道精  
 進不止何求不得何願不遂至哉斯言與  
 今釋尊所以勸駕阿闍王子五百同盟之  
 意則一而已矣然第六分中尚有一字關  
 文所當校正而增修者案釋尊所述無量

